



Broj: 01,02-05-1-1300/26

Sarajevo, 5. 6. 2026.

## KOLEGIJU PREDSTAVNIČKOG DOMA PSBiH

## KOLEGIJU DOMA NARODA PSBiH

## KOLEGIJU SEKRETARIJATA PSBiH

## ČLANOVIMA DELEGACIJE PSBiH U IPU-u

### IZVJEŠTAJ, Republika Srbija, Beograd, 1 - 4. juna 2026. godine

Poslanica u Predstavničkom domu Parlamentarne skupštine Bosne i Hercegovine (PSBiH) i članica Delegacije PSBiH u Interparlamentarnoj uniji (IPU) Ermina Salkičević-Dizdarević učestvovala je na Globalnoj konferenciji parlamentarki IPU-a, koja je održana u Beogradu.

Globalna konferencija parlamentarki IPU-a bila je jedinstvena prilika za razmjenu ideja, mišljenja, stavova i dobrih praksi kojima se definiraju zajedničke i inovativne strategije za unapređenje rodne ravnopravnosti, prava žena i njihovog osnaživanja. Program Konferencije obuhvatio je različite interaktivne panele i sesije radnih grupa te se bavio aktuelnim pitanjima s ciljem pružanja rodno odgovornih smjernica za izradu politika. Oslanjajući se na Akcioni plan o rodnoj ravnopravnosti u parlamentu koji je usvojen na Globalnoj konferenciji parlamentarki IPU-a 2025. godine u Meksiku.

Konferencija, koju su zajednički organizirali IPU i Narodna skupština Republike Srbije, bila je fokusirana na glavnu temu pod nazivom „Unapređenje pariteta: razbijanje barijera rodnih stereotipa i negativnih društvenih normi“.

Konferenciju su uvodnim izlaganjima otvorile ministrica državne uprave i lokalne samouprave u Vladi Srbije Snežana Paunović i predsjednica Narodne skupštine Srbije Ana Brnabić. Uvodna izlaganja imali su i generalni sekretar IPU-a Martin Chungong, predsjednica IPU-a Tulia Ackson, kao i predsjednica Biroa žena parlamentarki IPU-a Cynthia Lopez Castro, koja je podsjetila na Akcioni plan o rodnoj ravnopravnosti u parlamentu, usvojen na Globalnoj konferenciji parlamentarki IPU-a 2025. godine u Meksiku.

U svom obraćanju, u okviru druge sesije posvećene unapređenju pariteta kroz različitosti s fokusom na stereotipe i norme, članica Delegacije PSBiH u IPU-u Ermina Salkičević-Dizdarević upozorila je da stvarna jednakost traži da dublje zagrebemo i zapitamo se koje to žene uspijevaju ući u parlamente, a koje ostaju potpuno nevidljive. „Biti mlada žena, žena iz ruralne sredine, žena s invaliditetom ili pripadnica manjina – u našim društvima prečesto znači biti unaprijed otpisana“, naglasila je Salkičević-Dizdarević te podsjetila da, prema zvaničnim podacima Ujedinjenih naroda i evropskih agencija, na globalnom nivou svega 27% žena ulazi u parlamente, dok se žene s invaliditetom ili pripadnice manjina suočavaju s dvostruko većim stepenom diskriminacije i isključenosti.

Prema riječima Salkičević-Dizdarević, u Bosni i Hercegovini te brojke su još surovije, budući da zvanični profili rodne ravnopravnosti pokazuju da je učešće žena sa sela ili žena s invaliditetom na mjestima odlučivanja bukvalno na nuli.

„Mi na papiru imamo kvote, ali tradicionalne barijere u praksi eliminiraju one najranjivije među nama. Naše institucije za ljudska prava, poput ombudsmena, s pravom upozoravaju da diskriminacija počinje već kroz rodno neosjetljiv jezik naših zakona koji ignorira žene na pozicijama moći. Zato naša borba u parlamentima ne smije biti borba za kozmetičke promjene. Paritet bez različitosti je samo nova forma isključivosti“, poručila je Salkičević-Dizdarević. Citirajući prvu predsjednicu Čilea i izvršnu direktoricu UN WOMEN Michelle Bachelet, koja je rekla da „niko ne može tvrditi da gradi demokratsku budućnost ako je polovina stanovništva marginalizirana ili spriječena da u njoj učestvuje“, Salkičević-Dizdarević pozvala je parlamentarke IPU-a da iskoriste svoju zakonodavnu moć kako bi se srušile te isprepletene barijere. „Svaka od nas dužna je da iza sebe ostavi otvorena vrata za sve žene koje dolaze, bez izuzetka, jer samo tako gradimo istinsku demokratiju“, poručila je na kraju svog izlaganja Salkičević-Dizdarević.

Cilj Globalne konferencije parlamentarki IPU-a jeste identificirati stereotipe i društvene norme koje ometaju političko učešće i liderstvo žena i predstavljaju izazov za rodnu ravnopravnost u parlamentima. Učesnici će identificirati negativne društvene norme o ženama u politici, analizirati kako te norme oblikuju stavove, percepcije i sisteme koji održavaju političku isključenost žena te istražiti načine za rješavanje i transformaciju tih stereotipa i društvenih normi ka paritetu spolova u političkom životu i na pozicijama donosilaca odluka. Drugog dana Globalnog foruma parlamentarki Interparlamentarne unije (IPU) poslanica Ermina Salkičević-Dizdarević aktivno je učestvovala u radu Grupe 1, koja se pod okriljem agencije UN Women bavila temom međugeneracijske saradnje u borbi protiv stereotipa i negativnih društvenih normi. Tokom ove sesije učesnici su kroz raspravu i razmjenu iskustava analizirali na koji način negativne društvene norme, povezane s godinama i spolom, oblikuju političko učešće i liderske pozicije žena u parlamentima. Poseban fokus stavljen je na izradu preporuka za jačanje međugeneracijske solidarnosti, razvoj programa mentorstva i izgradnju inkluzivnijih i reprezentativnijih političkih institucija koje će omogućiti ravnopravan glas svim generacijama žena.

Izveštaj odobrila

Članica Delegacije PSBiH u IPU-u

Ermina Salkičević-Dizdarević

Izveštaj pripremila

Dženana Leper

Stručna savjetnica za bilateralne odnose

Sektor za međunarodne odnose i protokol

Dostaviti:

- naslovu
- Sektoru za međunarodne odnose i protokol
- Sektoru za odnose s javnošću